


TEZAU LITURGIC

23 IANUARIE

SLUJBA SF. IERARH PAULIN CEL MILOSTIV, EPISCOPUL NOLEI



MOSCOVA, 2000



Служба святителю Павлину, епископу Ноланскому

На велицей вечерни

На Господи воззвах: стихирьы на 8, глас 6:

Днесь торжествуют мира концы / память
святителя великого, / и радуется вся вселенная,
/ величающе Павлина божественного // яко
образ совершенного на земли жития.

Многоводная реко, / чудес волнами шумящая /
и милости струи источающая, / явился еси,
Павлине. / Крепка, паче смерти, любовь твоя /
и яснее солнца твое милосердие, // тем же,
лучами твоими озаряемы, радуемся.

Авзония, славного ритора, ученик / славу и
премудрость мира откинул еси / и в горах
Пиренейских уединился, / глубину знаний твоих
христу посвятил еси, / тем же писаньями
твоими укрепляема // Церковь радуется.

Сокровище века златаго церковнаго / был еси,
святителю. / В составлении песней духовных
потрудился еси, / и множество благолепных
икон написал еси. / Провидя же издаличе духом
веры / грядущую ересь иконоборную, //
почитати святые образы и мощи всех поучал
еси.

Глас 8:

Аще и умре святитель Павлин, / но любовь его
во веки не отпадет, / почерпайте вси изобильно
его милости. / Прииди к нам от небесных высот,
/ посети наши скорби благодатию, / миром и
радостью и умилением обогащая, // и научи в
терпении тебе подражати.

Слава, глас той же:

«Аще кто хочет быти болий, / да будет всем
слуга», / — глаголет Христос, учеником ноги
омывая. / Тако и Павлин верным проповедует, /
первее все имение бедным расточая, / и с
супругою глад и лишения терпя, / напоследок
же и себя в рабство предавая, / воистину
возлюбив своих до конца, // ты же, Господи,
вложи нам подражати ему желание.

И ныне, догматик.

Паремии святителя.

На литии стихиры, глас 5:

Якоже звон колокольный, / из глубины первых
веков / звучит богословский глас твой, /
святителю, свидетельствуя учение древних
христиан, / его же до днесь хранит нерушимо /
Православная Христова Церковь. / Мы же с
тобою в истинах веры утверждаемы, // Христу
благодарение возносим.

Мы ропщем в скудости, / святитель же обнищал волею, / мы ищем ясти изобилия, / угодник же и последний хлеб раздаяше, / мы страшимся скорбей и бед, / сей же сам себе отдаде в рабство, / душу свою положивший за други, / и обители вечные у Христа обретый, // святителю истинный, слава тебе.

Даждь нам твою любовь, / даждь нам твое милосердие, / веру несомненную и терпение, // даждь нам спастися твоим путем.

Слава, глас тойже:

Что есть сильнее любви? / Сие слово утвердил еси, святителю, / сам возжелав пострадати, да страждующим / свободу даруеши. / Горького плена не убоялся еси, / душу за овцы своя положив, // с Ним же ныне царствуеши в свете невечернем.

И ныне, Богородичен.

На стиховне стихиры, глас 2:

Днесь почитаем память в рабство предавшегося / и всего себя истощившаго ради страждущих, // днесь призываем в помощь и по смерти бессмертнаго.

Днесь слагает святитель ризы епископства, / и облакается в рубище раба, / и приносит новую жертву богоподобную, / себе отдает в тяжкое рабство, // даруя избавление сыну вдовицы.

Днесь вопиет вдовица князю: / возьми
свободного и отпусти раба, / верни мое чадо и
поработи пастыря, / даждь ми сына и прими
отца, / избави мя от сиротства и обогатися
духовно, // ибо предлагают ти нетленный бисер
Христов.

Слава, глас тойже:

Рабство твое, о Павлине, / свободы многим быть
ходатайственно, / ибо, прозорливостью твоею
вразумлен, / царь отпускает из горького плена
// с тобою всех духовных чад твоих.

И ныне, Богородичен.

Мария Пресвятая, / от падений греховных
сохрани нас, / ты бо еси Голубица горелетная,
// чада свои под крыле собирающая.

Тропарь, глас 3:

Правило веры несокрушимья, / и образ
милосердия Христова был еси, Павлине, / вся бо
радости мира отринув, / за угнетенных в
рабство предался еси. / Тем же любовью твоею
озаряема, // вселенная славит тя.

На утрени

По 1-м стихословии седален, глас 1:

Славу святых воспевати дерзаю / и
добродетелей тех, увы, не подражаю, / но ты,

угодниче предивный, / преобрази и просвети
жизнь мою.

Слава, и ныне:

Владычице и матери моя Пресвятая, / мене,
грешнаго сына, / от вечные погибели спаси.

По 2-м стихословии седален, глас 4:

Будут имущие жены, яко не имущие, / глаголет
апостол, / сие слово к тебе приложимо, /
святителю, тем же ублажая высоту жития
твоего, / вопием ти: дух целомудрия подаждь
нам.

Слава, и ныне:

Чистая Дево, очисти сердца наша, / и возвыси
умы, / омрачений смрадом страстей.

По полиелее седален, глас 2:

Благодатный угодниче Божий, / научи нас за
други душу полагати, / гонений и уз не бояться,
но дело Божие / трезвенно совершати.

Слава, и ныне:

Воздвигни мой ум, обрадованная, к Небесному
Царю, / да плотское мудрование отложив, / горе
сердце мое вознесу.

По Евангелии стихира, глас 6:

Яко же звоном цветочных колоколец /
возвести тебе Господь, / сие и ты, угодниче, /

исполнение молитвы твоея, / даждь откровение
нашему духу, // яко услышано моление наше.

Канон, глас 3.

Песнь 1.

Ирмос: Воды древле:

Яко же ты сам потрудился еси / в писании
песен духовных, / тако и ныне нас умудри /
воспети твои подвиги, святителю.

В житии своем соблюл еси верность Господеви, /
рабства и нищеты не убояхся, / умножи убо и
нам веру, / да и не смущается сердце наше.

Ослабеваем дерзновением, / упования твердаго
не имамы, / на твое же взирающе дивное
житие, / духом обновляемся, святителю.

Богородичен: Владычице мира, Святых благая
собеседнице, / возглаголи сердцам нашим
утешение.

Песнь 3.

Ирмос: Иже от не сущих:

Купно со святителем Павлином / да почтется и
супруга его Тарасия, / яко великая жена
христианская, / обратившая мужа своего ко
спасению.

Не имея своих чад, / воспитал еси убогих и
сирот: / научи и нас о бесприютных детях
пещися / и разумети скорби сиротливых душ.

Посмеяния друзей не убоялся еси, / поносивших

тя за отречение от блеска мирского, / укрепи и нас без смущения / спасительное дело Христово совершати.

Богородичен: Молитвами безсеменно рождшия Тя, Спасе, / постави рабу Твоему / слово Твое и страх Твой, / да спасуся.

Седален, глас 7:

Странноприимец был еси, святителю, / воззри убо и на мя обнищавшего, / сокровище добродетелей расточившего, / и приими милостиво в вечные кровы, / утомленного странствием земным.

Слава и ныне:

Радуйся лестнице, иже Иаков виде, / к Небесному Отцу нас приводящая, / Богомати Пречистая.

Песнь 4.

Ирмос: Положил еси к нам твердую любовь:

Хочет враг нас, яко пшеницу, рассеяти, / но ты, добрый деятель Христов, / собери в небесные житницы наследие твое.

Яко же во дни пленения и прочих бед / был еси утешитель паствы твоя, / сие и нас печалию помраченных / просвети надеждою на Бога.

Превыше Иова воссиял еси нищетою добровольною, / он бо и на гноище свободен

пребыть, / ты же волею рабство приял еси, / да Христа приобщаеши навеки.

Богородичен: Воссиявшая миру великое солнце Христа / сподоби нас, Владычице, / животворящих и бессмертных лучей Его.

Песнь 5.

Ирмос: К Тебе утреннюю:

Многажды отдавал еси бедным / последний хлеб из дому твоего: / научи и нас подражать твоему примеру.

Не восхотел еси радоваться со счастливыми, / но, памятуя скорби убогих страдальцев земли, / сих участь предпочел еси: / нищету, бесприютность и рабство.

В письмах поучал еси пламенно / о пользе молитвы за усопших, / ныне помолимся, святителю, / о скончавшихся близких наших.

Богородичен: О светоносная Дево! В час исхода моего / отверзи ми двери Небеснаго Царства, / да идеже Господь мой, тамо и аз, / слуга неключимый, вселюся.

Песнь 6.

Ирмос: Бездна последняя:

Ты еси супружества о Господе венец, / ты и отречения монашеского образ: / тем же и монаси, и мирстии / чтим твою память с

любовию.

Кто ты достойно воспоешь, дивный Павлине? / Не
обретаем ангельских гласов, / да восхвалим
человека небеснаго.

Ныне совершил еси подвиг твой / и зриши Бога
лицом к лицу: / очисти и наши сердца, / да
убежим от ноши сомнений и неверия.

Богородичен: Владычице мира, / ослабевшую
душу мою / умудри к созерцанию
Божественных видений.

Кондак, глас 8:

Возвещал еси усердно, святителю, / о силе
ходатайства святых за мир, / ныне писанное
тобою делом яви, / яко великий угодник Божий,
/ возвесели сердца зовущих: // радуйся,
Павлине, святителю милостивый.

Икос:

Ангел утешитель скорбящих и немощных
кроткий / к небесам путеводитель был еси в
житии твоём, святителю, / душу свою за
спасение униженных / положил еси, тем же
ароматом добродетелей твоих / услаждаемы,
величаем тя хвалебно: / радуйся, благоуханное
миро смирения, / радуйся, добрыми делами
Отца прославимый, / радуйся, любовию
скорбных согревая, / радуйся, образе

христоподражательного жития, / радуйся,
Божию славу жизни своей проявивый, /
радуйся, Павлине, святителю милостивый.

Песнь 7.

Ирмос: Якоже древле:

Ты был еси, отче, садовник искусен, / твоими
молитвами яви мя / яко цвет благоуханен, /
насажден в садах рая пресветлаго.

Обрет сокровище нетленное Христа, / ты первее
в горы уединился еси: / вразуми и нас
безмолвие любити, / да в тишине ума и сердца
узрим Бога.

Ты вся познания мирския, / всю мудрость
Господу посвятил еси, / научи и нас вся
дарования своя / во славу Его единого
обращати.

Богородичен: Владычице, Надеждо ненадежных,
/ не даждь до конца погибнути ленивому рабу, /
но силою благодатною исцели / расслабление
воли моея.

Песнь 8.

Ирмос: Нестерпимому огню:

Среди нашествия варварского и нестроений /
извел еси корабль паствы твоея / в тишину
Христову, / тако и с нами сотвори.

Умоли Христа Бога о Церкви, / ересьми,

неверием и распрями обуреваемой, / даждь
пастырем силу и мудрость / право правити
слово Господней истины.

Вопиют к Тебе священных соборы / и
монашествующих полки: / на твердом камени
веры Христовой / утверди сердца, тьмою бед
ураженныя.

Богородичен: Светоносным омофором Твоим,
Пречистая, / Церковь Сына Твоего / всегда
охраняй от искушений и непосильных бед.

Песнь 9.

Ирмос: Новое чудо:

Ты еси чистоты светильник / и воистину друг
Божий, / исторгни нас из блата страстей / и
сладоствию духовной напитай.

Ты еси врач согрешающим, / ты еси пастырь
премудрый, / управи наше мятежное житие / к
обители святыни и покоя вечнаго.

Многажды восхвалял еси / тайну Святыя
Евхаристии, / пробуди в суетных душах наших
/ жажду Святаго Причастия.

Богородичен: Преблагословенная, Чистая, /
пребуди со мною на всяк день же и час, / да
радостен буду, и не впаду в сети / отчаяния и
нечестия.

Светилен:

Яко светило неугасаемое / и по смерти
показался еси, святителю, / благоуханием
мощей твоих целебных / и красотой великих
чудес.

Слава, и ныне:

Спаси, Христе Боже, люди Твоя, / и страну
осени тишиною, / за молитвы Матери Твоея / и
Павлина милостиваго.

На хвалитех стихиры, глас 4:

Такое вопиет святитель верным: / дерзайте, чада
моя, / аще и далече в Риме почиваю, / но духом
неразлучен с любящими мя / и призывающих с
верою зрю, // непрестанно молюсь о душах
ваших.

Такое глаголет угодник молящимся: / яко же при
жизни моей, / слыша вопль скорбей и нищеты, /
ускорял за ны помощь, / сие и ныне не могу
зрети страданий человеческих / и гряду всех
утешити // благодатию Божественных
милостей.

Глас 8:

Святителю отче Павлине, / яко же Илия
возносимый, / даде благодать свою Елисеови, /
сие да опочит и на нас / твоя неисчерпаемая
сила духовная, // благодатно славящих память
твою.

Слава, глас тойже:

Святителю отче Павлине, / яко же человек нося ароматы / сам благоухания исполняется, / тако с тобою молитвенно соединившейся / да исполнимся твоих добродетелей миром, // и наслаждение вечное унаследуем.

И ныне.

Явилася еси купина пламенеющая, / с человеки соединившая огонь Божества, / страсти наша очищающая, / пламень Божественного умиления. / Тем же ты вси роди ублажаем, // Всеблаженная.

